



狼毒

根

【气味】辛，平，有大毒。

【主治】咳逆上气，破积聚饮食，寒热水气，恶疮鼠瘻疽蚀，鬼精蛊毒，杀飞鸟走兽。本经。除胸下积癖。别录。治痰饮癥瘕，亦杀鼠。大明。合野葛纳耳中，治聋。抱朴子。

【附方】旧四，新六。心腹连痛作胀。用狼毒二两，附子半两，捣筛，蜜丸梧子大。一日服一丸，二日二丸，三日三丸止；又从小丸起，至三丸止，以瘥为度。肘后方。九种心痛一虫，二蛙，三风，四悸，五食，六饮，七冷，八热，九气也。又治连年积冷，流注心胸，及落马堕车，瘀血中恶等证。九痛丸：用狼毒炙香，吴茱萸汤泡，巴豆去心，炒取霜，干姜炮，人参各一两，附子炮去皮三两，为末，炼蜜丸梧子大，每空腹温酒下一丸。和剂局方。腹中冷痛水谷阴结，心下停痰，两肋痞满，按之鸣转，逆害饮食。用狼毒三两，附子一两，旋覆花三两，捣末，蜜丸梧子大。每服三丸，食前白汤下，日三服。肘后方。阴疝欲死丸缩入腹，急痛欲死。狼毒四两，防风二两，附子三两烧，以蜜丸梧子大。每服三丸，日夜三度白汤下。肘后方。两胁气结方同腹中冷痛方。一切虫病用狼毒杵末，每服一钱，用汤一皂子大，沙糖少许，以水化开，卧时空腹服之，次早即下虫也。集效方。干湿虫疥狼毒不拘多少，捣烂，以猪油、马油调搽患处。方睡勿以被蒙头，恐药气伤面。此维扬潘氏所传方。蔺氏经验方。积年疥癩狼毒一两，一半生研，一半炒研，轻粉三合，水银三钱，以茶末少许，于瓦器内，以津液擦化为末，同以清油浸药，高一寸，三日，待药沉油清，遇夜不见灯火，蘸油涂疮上，仍以口鼻于药盏上吸气，取



效。永类方。积年干癣生痂，搔之黄水出，每逢阴雨即痒。用狼毒末涂之。圣惠方。恶疾风疮狼毒、秦艽等分，为末。每服方寸匕，温酒下，日一二服。千金方。

防葵

【释名】房苑、梨盖、利茹、爵离、方盖、农果。

根

【气味】辛，寒，无毒。

【主治】疝瘕肠泄，膀胱热结，溺不下，咳逆湿暗，癰痛惊邪狂走。久服坚骨髓，益气轻身。本经。疗五脏虚气，小腹支满脐胀，口干，除肾邪，强志。中火者不可服，令人恍惚见鬼。别录。久服主邪气惊狂。苏恭。主疝瘕气块，膀胱宿水，血气瘤大如碗者，悉能消散。治鬼疟，百邪鬼魅精怪，通气。甄权。

【附方】旧一，新二。肿满洪大防葵研末，温酒服一刀圭，至二三服。身咽及小不仁为效。肘后方。癰狂邪疾方同上。伤寒动气伤寒汗下后，脐左有动气。防葵散：用防葵一两，木香，黄芩，柴胡各半两。每服半两，水一盞半，煎八分，温服。云岐子保命集。

狼牙

【释名】牙子、狼齿、狼子、犬牙、抱牙、支兰。

根

【气味】苦，寒，有毒。

【主治】邪气热气，疥瘙恶疮痔，去白虫。本经。治浮风瘙痒，煎汁洗恶疮。甄权。杀腹脏一切虫，止赤白痢，煎服。大明。

【附方】旧六，新四。金疮出血狼牙草茎叶，熟捣贴之。肘后方。小便溺血金粟狼牙草焙干，入蚌粉、炒槐花、百药煎，等分为末。每服三钱，米泔空心调服。亦治酒病。卫生易简方。寸白诸虫狼牙五两，捣末，蜜丸麻子大。隔宿不食，明旦以浆水下一合，服尽即瘳。外台秘要。虫疮瘙痒六月以前采狼牙叶，以后用根，生咬咀，以木叶裹之，焙火炮熟，于疮上熨之，冷即止。杨炎南行方。小儿阴疮狼牙草浓煮汁洗之。千金方。妇人阴痒狼牙二两，蛇床子三两，煎水热洗。外台秘要。妇人阴蚀疮烂者。狼牙汤：用狼牙三两，水四升，煎取半升，以箸缠绵浸渍洗，日四五遍。张仲景金匱玉函。辟耳出汗狼牙研末，绵裹，日塞之。圣惠方。毒蛇伤螫独茎狼牙根或叶，捣烂，腊猪脂和涂，立瘳。崔氏方。射工中人有疮。狼牙，冬取根，夏取叶，捣汁饮四五合，并傅之。千金方。

蒴藋

【释名】离萎、掘据、白者名草蒴藋。

根

【气味】辛，寒，有小毒。

【主治】蚀恶肉败疮死肌，杀疥虫，排脓恶血，除大风热气，善忘不寐。本经。去热痹，破癥瘕，除息肉。别录。

【附方】旧二，新二。缓疽肿痛蒴藋一两，为散，温水服二钱匕。圣惠方。伤寒咽痛毒攻作肿。真蒴藋爪甲大，纳